

HE MAHI

NA

TE HUI O TE HAHU MAORI

O TE

TAKIWA O HERETAUNGA,

I WHAKAMINEA NEI KI

OMAAHU

I A OKETOPIA 9, 10, 1882.

New Zealand:
PRINTED AT THE "DAILY TELEGRAPH" OFFICE, NAPIER.

1883.

MAH

41815

HE TUHITUHINGA

i nga mahi a te Hui o te Hahi Maori i whakaminea ki Omaahu i te 9 o nga ra o Oketopa, 1882.


No te Ratapu, no te 8 o nga ra o Oketopa ka huihni katoa nga tangata o te Hui, me te iwi kainga, ki te Whare Karakia o Tepene i Omaahu, ka takoto hoki te Hapa a te Ariki. E 44 te hunga i tango i te Hapa.

No te Manci, no te 9 o nga ra ka huihui ki roto ki te Wharekura i Omaahu i te 11 o nga haora. I karangarangatia nga ingoa o nga tangata o te Hui, me te whakao enei ki o ratou ingoa.

MINITA: Ven. Archdeacon Williams, Rev. S. Williams, Rev. T. Huata, Rev. W. Goodyear, Rev. Hone Pohutu, Rev. Manahi Te Aro, Rev. Nirai Runga.

MANGAI REIMANA: Hekera Ponga, Ihakara Tuhi, Tepene Waewaeporo, Wiremu Te Kahu, Utuku Te Paetaka, Eparaima Purei, Hohaia Te Hoata, Rewi Tamihana, Henare Tomoana, Hoterene Rahi, Pene Te Uamairangi, Maika Iwikatea, Nepe Te Apatu, Paora Tamaihotua, Harawira Te Tatere.

Katahi ka ki te Pihopa kua tu te Hui, ka timataia hoki e ia te mahi ki te inoi. Muri iho ka whaikorero ia ki te Hui.



WHAI-KORERO A TE PIHOPA.

E HOA MAI:

Ka waru enei tau i kore ai he whakaminenga o te Hui o te Hahi Maori o tenei takiwa. E rite ana enei tau ki nga marama o te hotoke; ko te whakahoutanga o tenei mahi inaianei, me te mea ko nga marama e whakatata ana ki te raumati. Ma te Atua e mea kia nui haere nga hua pai o tana Hahi i tenei takiwa, kia rite ki tana whakanuinga i nga hua o te whenua i te ngahuru.

Ehara ano ia i te mea he tau hua-kore anake enei tau e waru ka pahure ake nei; ina hoki tenei ano nga mea e whakawhetai ai tatou ki te Atua. Tokorua tonu nga Minita Maori i tera wa; inaianei ia kua tokorima. Tenei ano hoki etahi whare-karakia hou kua tu. I te kawanga o enei whare-karakia, he tokomaha nga tangata i huihui i ia wa, i ia wa, ki te whakangahau i te mahi pai.

E matau ana koutou ki te mahi a to koutou Minita, a Te Wiremu e haere nei i roto i a koutou whakaako ai i a koutou ki nga tikanga o te Rongo-pai; he manaakitanga na te Atua i tana mahi i u ai nga iwi o tenei takiwa ki te Whakapono. Ko ia to koutou hoa i nga wa o te raruraru; ko tona hiahia hoki tenei mo koutou inaianei, kia whakatupu kaumatua koutou i runga i te Whakapono. Tetahi mahi hoki ma tatou inaianei, he rapu i etahi tikanga e puta ai te koha a nga mea e kaha ana hei whakakaha i nga mea e ngoikore ana.

Kia puta ta tatou whakawhetai, e hoa ma, ki te Atua mo tana pupuri i te Hahi Maori o tenei takiwa kei uru atu ki nga mea horihori i kahakina ai nga tangata o etahi wahi. Heoi ano te mea i kore ai koutou e rite ki a ratou, ko te atawhai anake a te Atua. Kei konei ano nga whakamatauranga i hinga ai era, otira na te aroha o te Atua koutou i tohutohu kia maro te haere i te huarahi tika. Heoi ko te mahi ma koutou, i a koutou e whakamoemiti nei ki te Atua mo tenei, he whakaputa i te uaua ki te whakahoki mai ki runga ki te huarahi pai i nga tangata kua kotiti ke.

Kua waiho ano to koutou unga ki te Rongo-pai hei whakaoho i etahi i te huihui ki Wairarapa i mua tata ake nei. I te haerenga hoki o to koutou hoa, o Te Wiremu ki Waikato, ko tetahi mea tenei i ata whakarangona ai tana korero ki nga iwi kua whakarere nei i te Rongo-pai, ara ko tana whakaaturanga i nga tangata o tenei takiwa kei te haere tonu i te huarahi tawhito o te Rongo-pai.

Nga mea hei hurihuri ma koutou inaianei, ko nga mea ano e mahia ana e etahi atu Hui o te Hahi Maori, ara, ko nga Whare-karakia kia hangaa, kia whakapaia; ko te orange-tinana mo nga Minita, ko te whakakaha hoki i ta ratou mahi; ko te whakatupu pai i nga tamariki.

Ma te Wairua Tapu tatou e arahi kia kitea ai e tatou he tikanga e tupu pai ai te Hahi, e nui haere ai ona rohe.

Ko nga Ki enei i whakapuakina e te Hui o te Hahi Maori ki Omaahu i a Oketopa 9, 10, i te tau 1882.

I. MO TE WHAI-KORERO A TE PIHOPA.

E whakamihi ana te Hui nei ki te Pihopa mo tana whai-korero, he ki atu hoki tenei ki a ia kia whakaae mai ia ki aua korero kia perehitia.

II. MO Nga Mahi a te Hahi kia whakaaturia ki te Hui.

Kia takoto he tikanga mo te minenga o te Hui o te Hahi Maori mo nga tau e takoto ake nei, kia whakaaturia mai ki te Hui e te Minita, e nga tangata o ia Pariha, o ia Pariha, te ahua o nga mahi katoa a te Hahi ki to ratou Pariha.

III. MO Nga Kohikohinga moni hei kawé i te Rongo-pai ki nga tauwi.

Ki te pai te Pihopa me waiho te Ra Whanautanga o Te Karaiti hei ra kohikohinga ki ia Pariha, ki ia Pariha i te moni mo te kawé i te Rongo-pai ki nga tauwi.

IV. MO Nga Ki a te Hui i era tau.

Kauaka nga tangata o te Hahi i tenei takiwa e wareware ki nga kupu i whakatakotoria e te Hui o te Hahi i nga tau kua mahue ake nei ; engari me tahuri ano ki te mahi i nga mea e hapa ana.

V. MO TE Whare Minita.

Kia puta ano he kupu akiaki ma tenei Hui o te Hahi ki nga Pariha e kore ana he Whare Minita kia hangaa he Whare Minita.

VI. MO TE Kura Ratapu.

Kia puta ano he kupu akiaki ma tenei Hui o te Hahi kia whakaakona nga tamariki i nga Ratapu i ia kainga, i ia kainga ; kia tokomaha hoki he kai-kura i nga tamariki.

VII. MO Nga Karakia pohehe.

Kia kaha te tohe a nga tangata katoa o te Hahi i tenei takiwa ki nga tangata e mau nei ki nga karakia pokanoa, pohehe, kia whakarerea.

VIII. MO TE ORANGA MO TE PIHOPA.

He kupu tenei ki nga Pariha katoa o tenei takiwa kia kohikohia he moni hei oranga mo te Pihopa o tenei Pihopatanga.

IX. MO TE HUI O TE TAU E HAERE AKE NEI.

Hei Omaahu ano te Hui o te Hahi Maori a tenei tau e haere ake nei.

